

2 PETER

Lat Thonangan Inan Peter.angan Ump

¹ Ngaya, Simon Peter, ngay lat inan umpang niyant, ngaiya pam workan iyy-iiyangan Jesus Christ.anta nil puth kuch ngayang wik nungantam inangan waa'āng niyanta. Niiy pam wanch God.antam ngula, ke' ngan yimanangan, nil God.angan ump ngampang pam wanch nungantam iiyāmp, a' putha ngampaniya ngangk ngam-parakam kan thee'amp nungant Christ.antan. Nil piip God.ana mina a' putha nil Jesus Christ.ang kaa'-piichanath ngampang, nil min paththama. ² Niiyaniya mee'miy pulang piip Goda a' putha Jesus Christ.an moom pi'an ngamparamana, puth nanpalana ngay kaangk pul kucham anangana anman min-minam paththam iyy-iiyowpul niyant puth ma'-aath-aathowpul niyang niiy yipam ngangk minangaman iyy-iiyānweya.

Nil God.angan Mi' Ngampang A' Ump Ngampang Pam Wanch Nungantaman Iiyāmpa

³ Nil God.angan ump ngampang ngampan yipam ngangk thee'āmp nungant Christ.ant a' minam iiyāmp ke' nil Christ anman iyy-iiyan. Ngamp puth kan thiichamp nunang a' puth ngangkang pi'-pi'anamp nunanga, a' puth anpalan nilan ngampang ma'-aath-aathan, ngampan yipam kan-kanam monkan-wakāmp nunanga, nilan puth thayan paththama. ⁴ Nil min paththam nil ke'-paal wik min paththam waa' ngampar, nil kaa'ngak ngampang nilan ma'-aath-aathow ngampang ngamp yipam woyan wayan wantāmp a' nil yipam Ngeen-Wiy Min nungantaman ngangk ngamparamang wunow. Puth pam wanch yot way iyy-iiyant, ngangk thanttam way alangan

mungkl-mungkan thanang, puth Christ.angan ma'-aath-aathan ngampang ngamp yipam woyan way wantāmp a' ngampan ke' Jesus Christ yimanangan iiyāmp.

⁵ Niiyana puth Christ.antan ngangk kan thee'an, yaa, niiyaniya ke'-ngoongkam anman monkan-wak-wakān nunang. Aakan yimanangan wuna ngangk minangaman iiy-iiyāmp Christ.antangana: ngampaniya woyan min anan wak-wakāmpa, a' min iiy-iiyāmp pam wanchantan a' putha ngampaniya min-minam wik Christ.antaman konangam pi'-pi'āmpa; ⁶ a' putha ngampa woyan ngamparakamana ke' wak-wakāmpa, ya'a, ngampan woyan Christ.antaman mi'āmpa. Than pam wanchangan thaa'-thengkathayn ngampang-a, yaa, ngampana anman ke'-ngoongkam ngangk thayanam iiy-iiyāmp Christ.antangan, monkan-wakāmp nunang minama, ⁷ a' putha ngampiya kaangk wunāmp thama pam wanch Christians wiy al-alantan a' putha ngangk minangam iiy-iiyāmp thant pam wanch yotamanta. ⁸ Ngamp kan-kanaman yimanangan iiy-iyimpwey-a, yaa, ngampana kan-kanam Christ.an thiichāmpan putha ngampaniya work min ngul iiy-iiyāmp ke'-ngoongkam nungantana. ⁹ Nil wee'wey woyan inan ke' wakiw-a, puth nilaniya woyan kaa'-way inam wak-wakan ke' pam ko'anchang yimanangan, woyan piip God.antaman ke'-ngulan thathiy, ya'a, a' nil ke'-ngul ngaantam-ngeeyan nil God.angan ka'athaman ngangk pachath nunang.

¹⁰ Ngurp ngatharama, kan in ngeeyāna, ngamp ngaantam-ngeeyāmpa nil God.angan keenkanaman mi' ngampang thaa'-palath ngampang puk nungantaka, a' ngampaniy-a, ngangk thayanam monkan-wakāmp nunang. Ngamp nathwey ngangk thayanaman monkan-wak-wakimp nunang puy-puyamana, ngampana meenathimp ngampan kan-kanaman puk God.antam

ngula a' ngampana ke'-ngul woyan God.antaman wantimp, ya'a. ¹¹ A' puth anpalaniy-a, nil moom pi'an ngamparamang Christ.angan ngangk minangam ngoonchathow ngampang aak nungantamangana, ngamp angman wun-wunāmp ngula, nil puth ka'athangaman kan kaa'-piichanath ngampang. Aak anganiya nil min-min pi'-pi'ow ngampang aak umpuyangam.

¹²⁻¹³ Yaa, puth ngayaniya wik anangaman waa'-waa'āng niyant. Nungkway niy wikan kan mee'miy a' puth ngeey-ngeeyaniy-a, ngayiy puth wik anangaman waa'-waa'āng niyanta ngayan man-yethaman yippak iyy-iiyang. An min niyant. ¹⁴ A' ngay mee'miya ngay yaaman ke' man-yetham wuning, ya'a. Moom ngamparamana Jesus Christ.angana waa' ngathar ngay yip-yipam uthamānga. ¹⁵ Ngayiya wik ngatharam inangan latang ngul kuchāng niyant, yaa, ngay mul ngulan wunāng-a, niyan yipmam wik inangan readimpungānweya a' putha ngaantam-ngeeyān thanang.

Ngan Mee' Nganttamang Thath-Thathan Nil Christ.an Kan-Kanam Mina A' Pi'an Paththama

¹⁶ Nganan waa'an niyant moom ngamparam Jesus Christ.an nil wuut pi'an paththam a' palam ngul wampow. Ngul ngan wik inangan wik nganam ngunch-ngunchanan ey? Ya'a! Ngan ke' muukamathin niyanga! Ya'a! Ngan mee' nganttamang thath-thathana, nil Christ.an kan-kanam mina, wuut pi'an paththama. ¹⁷⁻¹⁸ Nganweya karpam yoykangan matan yoyk ngench thayanang angman, putha ngan wik ngeeyan nunang piip God.an nil Christ.an thaa'-kuump nunang. Nil wik inangan inpal kenyan thaw, "Inan nhenk ngath-arama. Ngay kaangk paththam nungant. Ngangk ngatharaman min paththam wun nungantamaniya." Nil

wik inangan kanan thaw-a, a' ngan nganth nungantaman thathan angman Christ.antang park-park. ¹⁹ Pam al-alangana, prophets God.antamangan Christ.an waa'-waa'in lat ngench thayanangan puth ngananiya kan mee'miy ngul wik thanttamana an kan-kanama, puth nganan ep-paththam thathan nunang mee' nganttaman-gana. An niyant minweya niy wik inan kan-kanam ngeey-ngeeyāna Christ.antamana. Wik inanganiya ke' nganth aak ngaa'angan park-parkana, engkanang yipam thathāmp aak-aakanakaman nil Christ.an palaman wampow. Aak an-aniyangana, ngamp ngul thathāmpana.

²⁰ Niiy inan ngaantam-ngeeyāna: ngamp-ngampamana ke'a ngaantam-ngeeyimp a' ke' koochanathimp wik God.antam anangan. Nil God.angan nath ma'-aathiy ngampangana, an epa ngamp minam ngaantam-ngeeyimp, a' koochanathimp. ²¹ Puth than pam keenkanaman wunin-a, lat ngench thayanangan umpina, nil Ngeen-Wiy Min God.antam alangana waa'-waa' thant wik wanttakan umpayn latangan, thananiya kuchek waap thanttam anpalman ke'am ump-umpina, ya'a. Thanaman ke'am umpin, nil God.angan ep meenath thant wik inangan umpayn.

2

Pam Teachers Wayanang Ngul Wampayn Niiyanta

¹ Aak keenkanamana than pam puungkwiy al-alangana wik God.antaman minam ke'am waa'-waa'in, ya'a, way-wayak thak waa'-waa'in. Thanan puth ke' prophets God.antam waa'-waa'win thanttakam, puth ya'a, puth wik thanttaman kan-kanam ya'a, than yaan muuk-muukamin. Than pam teachers wayanang yimanang ngul wampayn niiyanta. Thananiya wik Jesus.antaman way-wayak thaa'-aath-aathayn niiyang puth thanan Lord

Jesus.an ke'am ngangkang pi'-pi'antan nunang. Puth niiyan wik thanttamwey ngeeyin-a, yaa, nil God.angan kan-kanam wayathow niiyang. Nil Jesus.an ngamparak utham, puth than teachers wayananganiya kaangk ke' nungantamanwey. Puth nil God.angan thanang erkam paththam aak wayak kuchow thanang. ² Teachers wayanang inangana woyan wayan wak-wakantan, thananiya maarich thak kee'-kee'antan. Puth pam wanch yot al-alangana woyan way thanttam teachers al-alantaman ngul wakayn, woyan way angman iiy-iiyayn! Than teachers way al-alangan ke' Christians waa'wuntan, puth ya'a, than puth way iiy-iiyantant. Than pam wanch yot al-alangan thathayn thanang wayan iiy-iiyantanan-a, an than ngul ngaantam-ngeeyayn ke' woyan Christ.antaman ke' min ya'a, a' thaa'-thengkathayn. ³ Than teachers inanganiya waya wukal-weenthiya. Thanan wik kuchek thanttam anpalan ngaantam-ngeeyantan, than wik wayanang anangan waa'ayn niyant niy yipam wukal thee'ān thant. Puth nil God.ana ke'am weep wunan, ya'a, nil thathan thanang. Puth nilan aak keenkan thaw nil um nungantangan thanathow thanang a' amanamaniya nil kuchow thanang ngul aak nungantam anpalana.

⁴ Aak keenkanamana, ngaantiyongk puungk wiy al-alangan way yump-yumpin. Nil puth God.angan ke'am kaa'-piichanath thanang, ya'a, nil aak way aakanakan kuch thanang. Nil chain kathanam pi'-pi'an thanang aak ngaa' nyim angan. A' thananiya angman wun-wunayn aak-aakanakaman nil um nungantangan thanathow thanang. ⁵ A' putha aak keenkanamana, than pam wanch yotang ke'-ngul wantin nunang God.an puth nanpalana nil ngak kaap wuut pi'an kuch thant than yipam uthamayn. Nilan pam Noah ep kaa'-piichanath

nunang, a' putha pam wanch seven thamp kaa'-piichanath thanang, an-anangaman thonakam. Nil pam Noah alangan wik God.antaman waa'-waa' thant pam wanch way al-alantan, nil ke' woyan minang wunpiy thanang, puth ya'angam, than way anman iyy-iiyin.

⁶ A' nil God.angan pam wanch wayanang anangan aak Sodom.angan puth aak Gomorrah.angan wunin-a, ke'am kaa'-piichanath thanang ya'a. Nil paththam aak kucham anangaman wayath pulang thumanga, a' than pam wanch yotamana mul wunin, a' kurk ngul wunin. Nil piip God.angan nanpalaan meenath ngampar nil kan-kanam wayathow ngampang pam wanch anangan ngamp man-mangkaman thee'anamp nungant.

⁷ Puth nil God.angan-a, pam thonam anman thonakam kaa'-piichanathan aak anganiya, namp nungantiya Lot. Nil puth pam min iyy-iiy, puth ngangk nungantamana way-wayam wunanta than puth pam wanch wiyangan way-wayam paththam yump-yumpin ke'-ngoongkama.

⁸ Nil Lot.ana thanttang angman wun-wun. Ngaa' thonthonan-a, nil thath-thath thanang way anman yump-yumpin, a' putha ngeey-ngeey thanang, nilaniya ngangk thuthanam iyy-iiy thanttam anpalana.

⁹ Yaa, putha ngamp anpalana ngamp mee'miy ngul nil God.angan ma' thayanang pi'-pi'an ngampang pam wanch anangan wik nunangan ngeey-ngeeyanampa. Aak way nath wampow ngamparwey-a, an nil ngul kaa'-piichanathow ngampang ke' nilan Noah.ang pul Lot.angan kaa'-piichanath. Puth than pam wanch anangana wayan iyy-iiyantana, nil piip God.angan way-wayathow thanang, a' putha um nungantangan thanathow thanang, a' aak wayak ngul kuchow thanang aak nungantam anpalan.

¹⁰ Than pam wanch anangana wayan ngaantam-ngeeyantan way yumpanakan-a, maarich kee'-kee'antan thakan-a, nil

God.angan kan-kanam wayathow thanang. A' putha God.angan kan-kanam wayathow thanang pam wanch anangan than nunangan thaa'-thengkathantan a' than moom pi'an ke'aman ngaantam-ngeeyantan nunang.

Than pam teachers wayanang ulp-ulpanang thakan iyy-iiyantant, a' puth kaa'-thayan anangan iiyantant than woyan way thanttakam anman wak-wakantan. Thananiya thaa'-thengkathantan ngaantiyongk God.antan anangan an puth than ke'am winyng mo'antan God.antamana. ¹¹ Nungkway than ngaantiyongk anangan pi'ana a' thayan-a, than ke'am waa'antan thanang God.antan pam teachers wayanang anangan, ya'a. ¹² Puth than teachers wayanang anangana ke' ku' way kulliy anangan iyy-iiyantant, thanan ke' kuchek waap ke'anang iyy-iiyantant, a' putha thanan wik min God.antaman ma'-yotam kumantan, puth anpalana than wik anangan way waa'-waa'antan a' thaa'-thengkathantan. Nil God.angan ngul wayathow pam anangan thanang, ke' than pamangana ku' way kulliy anangan mamantan thanang mulathanakana.

¹³ Teachers wayanang il-ilangana pam wanch wiy anangan wayathantant thanang, way-wayak thaa'-aathantant thanang, nil God.angan-a, ngul wayathow thanang. Thananiya ngangk minangam wayan yump-yumpantant kinchangan mee' yotantangana. A' than kaangk muukamathayn niiyang. Thanan kaangk may niiyantangan munggayn ke' than tham Christians yimanangan iyy-iiyantant. Puth ya'a, than Christians ya'a. Niiy ngul-nyaa' wunin thanntama. ¹⁴ Thananiya mee' wir thee'antan wanchantant maarich yipam kee'athayn thanang, than wayan ke'am want-wantantant, ya'a. Christians wiy anangan mich yippak iiyantana, ngangk thayanam ya' yippak. Than teachers wayanang al-

alangan thaachantan thanang way iiyayn ke' than anmana wayan iiy-iiyantant. A' putha than wukal-weentha. Nil God.an thawa nil kan-kanam kuchow thanang aak nungantam anpalan. ¹⁵ Puth than pam way al-alangan woyan minan wantin nath ngul pankin God.antamana. Thananiya ke' pam prophet Balaam.an iiyantant, puk nhengk Beor alantaman, nil keenkan wuna. Nil wukal-weenth iiy-iiy. Nil wayan yump-yump wiyangan yipam wukal thee'-thee'ayn nungant. ¹⁶ Nil puth God.angana wak nunang wayan yump-yump. Kinch thonamangana, nil ke' way yumpiwwey-a, a' donkey nungantamana wik paththam thaw nungant ke' pam yimanangan, nil thaw nungant nil wayan yump-yumpana. Nil ke' way-wayam yumpiy-a, puth donkey nungantam alangana wayath nunang.

¹⁷ Than pam teachers il-ilangan wik God.antaman min-minak waa'-waa'iythana, puth ya'a, than minam ke'am pam wanch anangan thaa'-aathantan thanang ya'a, than way-way thamp thaa'-aathantan thanang. In aak yimanangan wunana, than pamang ngak pantamakan we'antana. Thanan ngaantam-ngeeyantan ke' ngak mee'an uwayna, puth ya'a, wiyiya, punth uman e' wunan. A' putha thon inan yimanangana: ke' yuw ngotanan thathanamp puth wunt alangan thechathan ngul, ngakana ke'am wampan ngul ya'a, than teachers way anangana ke' yimanangan iiy-iiyantant. Nil God.angan kuchow thanang aak nungantam anpalan, aak ngaa' paththam aakanakan iiyayn, ke' nil God keenkanaman thawa. ¹⁸ Than teachers wayanang anangana ulp-ulpanang wik way-wayak thakan thaw-thawantant, than thaa'-kuumpwuntant thanttakam, an puth wik thanan thaw-thawantant-a, an kan-kanam ya'a yaan muukamathantant thonakam. Puungk wiyiy pam wanch nyiingk-

nyiingk ngul Christians weeninweya, puth thananiya nyiingk-nyiingk woyan wayan wantin, puth than teachers wayanang al-alangan mee'-wichantan thanang puy-puyam way puthaman iyy-iiyayn, than thaachantan thanang maarich kee'ayn a' putha way wiy thakan yum-payn. ¹⁹ Thanan thawantana, “Niiy wik thayan ke' ngeeyāna, niiy kaangk want-wanttakan iyyān-a, puth yumpān thak-a, yaa, an kana, niiy ke' moom ke'anang yimanangan iyyāna.” Than anangan ngul ke' moom ke'anang yimanangan iyy-iiyantān ey? Ya', woyan way anana thanan wak-wakantan-a, an ke' moom pi'an thanttama, puth way alangan ngangk mung-mungkan thanang. An thananiya ke'-ngul wantiythan way anangan thanan yump-yumpantan ya'a, than way anman kaangk iyy-iiyayn, way thanan yump-yumpantan an ke' moom pi'an thanttamanweya, a' puth anpalan ngul wayamayn.

²⁰ Ngamp wee'-wee'anangan ngangkang pi'-pi'anamp moom ngamparam Jesus Christ.an-a, nilan kaa'-piichanathan way ngamparam anpalana, a' wichan ngampang woyan way anpalan. Ngamp koyamwey weentimp way ngamparam aakanakan-a, a' way anman ngul yump-yumpimpan-a, an way-wayam paththama. Anpalaniy-a, ngamp way-wayam paththam ngul iyy-iiyimp ke' keenkan ya'a, chil-chil iyy-iiyamp. ²¹ Nil pamang nathwey ke'wey thiichiy woyan Jesus.antaman-a, an way nungant. Nil God.angan wik thayan nungantam kan thee' ngampar. Puth pamangan nil nath thiichiy woyan Jesus.antaman-a, a' wik thayan God.antaman-a, a' wantiy ngulan-a, an way-wayam paththam nungant.

²² Yaa, niiy kan in ngeeyān than pam wanch yimanangan thawantan, “Than ku'angan oyngkan yeechantan-a, a' anpalaniya thananiya koyam iiyantān ngul a' oyngk thanan yeechina koyam ngul mungkantān.” A' putha

than yimanang thamp thawantan, “Than pamanga minh nhinthan anangan ngakangan pungantan thanang, puth minh nhinthan anangan-a, koyam iyantana a' aak pipangan ngul wuntan.” Yaa, than pam wanch anangan woyan min Christ.antam anpalaan koyaman iyantana woyan way aakanakan-a, an puth thaniya ke' ku' anangana iyantana puth ke' minh nhinthan yimanangan iyantana.

3

Nil Lord.an Kan-Kanam Palaman Wampow

¹ Ngurp ngatharam niyalang, ngay ka'athaman lat umpangan niyant a' putha ngay inan putham ngul lat umpangan niyant puth ngay kaangk niyana minangam ngaantam-ngeeyān wik anangana, way-wayana ke' ngaantam-ngeeyāna. ² Ngay kaangk niyana kuchekangam pi'-pi'ān wik anangan than prophetsan thaw-thawin keenkanaman a' putha wik thayan anangan Jesus.antama moom ngamparamantamana, nil alangaman ngampangan kaa'-piichanath. Nil God.ang pam yot kuyam kuch thanang than yipam wik nungantaman waa'-waa'ayn niyantana.

³ Niiy wik inan min-min ngeeyāna: aak thinthaman wampow nil Christ palam ngulan wampow-a, pam wanch way anangan ngul wampayn, a' thaa'-thengkathayn ngampang a' thanan anman way yumpayn, maarich kee'-kee'ayn thakan, puth than kaangk way anman yumpayn. ⁴ Putha than ngulan thawayn ngampar, “Nil Christ.an palam ke' wampam ey! Nil puth kaa'ngak nil palaman wampowa, ngul nil wanttin e? Kaath piip ngamparam anangan kanam uthamin, nil puth Christ.aniya palaman ke'am yippak wampa. An nil palaman ke' wampowa ya'a! A' putha God.an thawa aak earth inman ngampam wunanamp-a, nil epankathowa — an puth

ya'a, aak keenk nathpalman nil piip God.angan aak inan ka'athaman yump-a, a' in-inmana, aak inaniya anman wun-wunan", thanan yimanang ngulan man-aathayn ngampang. ⁵ Puth thananiya ke' ngaantam-ngeeyin wik inangan: aak keenkana nil piip God.an wik thonakaman thaw-a, a' aakan paththam wun aak in keny heavenana putha aak inman earthana. Nil aak earth inan ngakam an-palan pent a' ngak aak earthaman-a, God.angan yaarkath pulang. ⁶ Ngul-ngulana nilan ngak pi'an ngul kuch aak iikanakaman, a' pam wanch puk thakan wayath thanang. ⁷ Aakan ngul wampana nil ngulan than-thanathow ngampang yotam um nungantangana, a' nil thanang pam wanch puk anangan than kaangk ke'an nungantamana kuchow thanang aak way aakanakan. A' amanamaniya nilan thumang aak inan earthan wayathow ngul, puth aak in keny thaman wayathow, kincha, yuw-a, a' wiy anangan thakan wayathow. Nil God.an yimanangan thawa. Puth nil kuup-kuupana yippaka nil thanang pam wanchan wayathow aak-aakanakan.

⁸ Niiyalang, ngurp ngatharam-ang, niy inan min-min ngeeyāna: nil piip God.angan-a, wiy-wiyam ngaantam-ngeeyan, ke' ngamp yimanangan ngaantam-ngeeyanamp, ya'a. Ngampiy nathweya ngaantam-ngeeyimp kaap one thousandana ke' aak yaamakamweya, puth nil God.angan nath ngaantam-ngeeyan an ke' aak otang nungant, ke' kinch thonamang yimanangan, niliya nil-nil ngaantam-ngeeyan. A' puth ngampiy nathwey ngaantam-ngeeyimp kinch thonamang ke' aak otangama, puth nil God.angan nath ngaantam-ngeeyan an ke' aak yaamakam, ke' kaap one thousand yimanangan. ⁹ Niiy nath yimanangan ngaantam-ngeeyaniya, "Nil Lord.an yaam kuup-kuupana, nil nath ke' yumpiya wik anan nilaman thawa." Puth ya'a, niy in ngeeyāna, nil

Lord.an-a, itangam ke'am iyy-iiyan ya'a, nil niiyanta paththam kuup-kuupan, nil puth kaangk niiy yotaman way anangan too wantān ngul a' nungantang ngul iyy-iiyānwey. Puth nilan kaangk ke' aak nungantam anpalan kuchow niiyangan.

¹⁰ Nil Lord.an kan-kanam palaman wampow. Nil palaman wampow-a, an niiyangan ma'-pil-wayathowa ke' pam ma'-kuchana yimanangan wampow aak ngaa'angana. Aak an-aniyangan-a, an ngampaniy muut ngeeyāmp ke' wunt pi'an wampow a' yaam ke'anamana, kincha, thunpa putha wiy anangan ke'-ngul wunayn aak ing kenjana, ma'mangkam anangana pench-penchayn thum wuut pi'anang, aak ingman earthangan-a, ngak thakana penchayn thampa, aak ya'-ya'am wunowa. ¹¹ Ee'a, an kan-kanam paththam ma'mangkam anangan thum pi'anang ngul penchayn. Yaa, ngamp puth want-wanttak iyyāmpa? Ngampaniya woyan min koochanam iyy-iiyāmp Christ.antangana, wik nungantaman ngangkangam pi'-pi'āmp a' nunang anman monkan-wak-wakāmpa. ¹² Ngamp yippak kuup-kuupanaman nungant Jesus.ant palaman wampow-a, ngamp ngangk minang iyyāmp a' wik nungantaman waa'āmp. Nil palaman ngul wampowa, a' aak an-aniyangan-a, kinch-a, thunp-a, puth yuw in kenyan an thum wuut pi'anang ngul penchayn a' minchayn ngul, yuk way min ma'mangkam aak earthang inmana wukow a' michamayn ngul, aak karkan anpalmana. ¹³ Nil puth God.an thaw nil earth nyiingkanaman ngul yumpowa, putha yuw-a, kinch-a, a' wiy anangan thampa nyiingkanam yumpow thanang. Puth ngampaniy Christians.ana aak-aakanakan kuupāmp. Aak an-aniyangan-a, pam wanchana minam ngul wun-wunayn, wayana ya'-ngul.

¹⁴ Ngurp ngatharam niiyalang, ngampiya kuup-kuupāmp aak-aakanakamana, yaa, puth anpalana, ngaman ngangk thayanam ngul iyy-iiyāmp Christ.antangan, nil yipam thathow ngampang min anman iyy-iiyanamp, wayan ya', ngamp ngangk minangam nungantang iiyāmp. ¹⁵⁻¹⁶ Ngamp inangan min-min ngeeyāmpweya: nil moom ngamparam Jesus.ana palam wampow, puth nil yippak kuup-kuupan nil yipam wiy thamp pam wanch kaa'-piichanathow thanangweya. Kuunch ngamparam Paul alangan wik inaniy ma'-yotam ump ngampar thampa. Niliya pam God.antama a' piip God.angan kuchek waap min-minam thee'ant nil yipam wik minan umpow ngampar. Wik wiy anangan nilan ump-ump lat nungantamangana an wik engkanang ke'am wuntan ya'a, an wik wuthanang. Pam puungk wiy al-alangana wik nungantam anangana way-way waa'-waa'antan an puth anpalanwey than woyan min anpalan waank ngul thechantan. Wik wiy anangan thamp piip God.antamana lat ngench thayanangan-a, an yimanangan way-way waa'-waa'antan. A' wik God.antaman minam ke'am ngaantam-ngeeyantan. Anpalan puth-a, nil God.angan kuchow thanang aak wayakana.

¹⁷ Puth ngurp ngatharam niiyalang, niy puth kan mee'miy teachers wayanang anangan wampayn niyanta. Yaa, niy puth min-minakam pi'ān niyantakam, wik thanttam ke' ngeeyān, than yipam way-wayan ke' thaa'-aathayn niyanganwey a' puth mee'-wichayn niyang woyan min Christ.antam anpalanwey woyan way aakanakana. Niy anman ngangk thayanam monkanwak-wakan nunang Christ.ana. ¹⁸ Niy woyan chipchipamana ke' thanān niy ke'-ngoongkam anman iyy-iiyān woyan minang Christ.antamangan, niy yipam puy-

puyam thiichān nunang min-minweya, an niiyan thathān ngula nil kan-kanama puy-puyam min iiy-iiyan ngampara. Nil Jesus Christ.an moom ngamparama a' putha nilaman kaa'-piichanath ngampang way ngamparam anpalana. Ngampiya thaa'-kuumpāmp nunanga, a' putha aak umpuyam thaa'-kuump-kuumpāmp nunang.

Yey, kan-kanama! Anmanweya,
Peter.

Wik Inangan Kan-Kanam God.antama
The New Testament in the Wik-Mungkan language of Cape York,
Australia

copyright © 1984 Wycliffe Bible Translators

Language: Wik-Mungkan

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 14 Jun 2022 from source files dated 28 May 2022

034de520-6788-5805-9b17-b658084b38e2